

# Lou Mildiou

---

Enfin, de qu'as per fa la mina  
A touta oura ? dis Cesarina  
A soun ome. — M'agaças, mai !  
Ou sabes pas pardiou ! Ce qu'ai ?  
Sioi pla malaut, ou podes creire.  
— Al medeci vai te fa veire.  
Moussu Rastoul es de l'oustal ;  
Te paupara pertout ; antal  
Sauprem de qu'as se fas la trougna :  
— De poutingas ? salla besougna !  
— Se n'as besoun per te gueri !  
— Ambe tu cal toujours couri  
Vite aco de l'apouticaire ;  
Ai de trabal pressat à faire. . .  
Lou lendeman Jan sens emboul  
Anet trouba Moussu Rastoul,  
— Bounjour l'amic. De que t'amena ?  
Quante boun vent ? Nou ? as de pena !  
Quicom te dol ? — Oi sioi vengut  
Que sioi malaut. — As trop begut.  
— Nani moussu, me faù de billa,  
Sentisse aqui couma una espilla  
Dins moun detras qu'es enfiocat.  
Tout me prusis. Sioi emmascat.  
Pioi, quand m'en vau detras la rasa  
M'esquiche, fau couma de brasa.  
— Tant pla manjas trop espiçat ?  
Aco sero vite passat,  
Toun mal n'a pas granda impourtança.  
Aqui per tus una ourdounança.  
T'enquiètes pas ! ajes d'espèr  
Engouliras matin et ser  
Quauques cachets dins de tisana

E reprendras tourna de gana . . .

— Gramacis, dis Jan en paguent.

E sourtiguèt. Tout courriguent

Anet croumpa sa medecina.

— E be de qu'as, fai Cesarina ?

— Pas res, moun mal es pichotet,

Veses me cal prene un cachet

Matin e ser ; aqui la boueta.

Costa vint francs. Aco t'inquieta ?

S'agis que leu siogue amoussat

Lou mal que m'o tant tracassat . . .

Jan acabet sa medecina

Mes toujours al founs de l'esquina

Ressentissiò lou prusiment

E se grataba a tout moument.

Devariât,, soulet roundina

E sens res dire à Cesarina.

Mai retournet al medeci.

Bounjour ! sioi mai vengut aici

Vous dire que toujours souffrissi

Al même endrech. Aqui sentissi

Mai que jamais tout un fiocas.

— Anam veire de pres toun cas.

Me cal saupre d'ount ven la causa

Dis lou doctour. Anèm, Jan, pausa

Tas bralhas . . . La ! vira . . . Toussis . . .

Aqui te dol ? — Oi, me prusis,

- Diantres ! de qu'as dins la coudena ?  
Mous cachets fan d'efet ? — A pena.  
Mes, me caprice e, cada journ,  
Joust la souca vau faire un tourn.  
— Te sios pounchat a quauqua espigna ?  
— Ambe la fiolhas de la vigna  
Me frete dur. — Ara ie sioi !  
M'estouna pas s'aco f'escoi !  
Digas, ta vigna es mildiousada ?  
— Pardiù ! cinq cops l'ai sulfatada.  
— Veses, Jan, que me sioi pas troumpat  
Es lou mildiou qu'as arapat.

Paulin VAISSADE.